



Broj: 05-05-26551/11  
Sarajevo, 28.11.2011.godine

Skupština Kantona Sarajevo  
- Ovdje-  
n/r Sekretara

**PREDMET:** Odgovor na poslaničko pitanje Kenana Ademovića

Poslanik Kenan Ademović je na 8.Radnoj sjednici Skupštine Kantona Sarajevo, održanoj dana 20.10.2011.godine, u okviru tačke dnevnog reda „Poslanička pitanja, inicijative i odgovori“, postavio slijedeće pitanje:

„Zašto se svako veče između 22,00 i 24,00 sati zatvara voda građanima koji žive na lijevoj obali rijeke Miljacke“?

**ODGOVOR:**

Urednost vodosnabdijevanja nekog područja preduzeće obezbjeđuje u skladu sa tehničkim mogućnostima sistema, raspoloživim količinama vode koja se eksploatiše, odnosno akumuliranim količinama vode dovoljnim da se obezbijedi kontinuirana dnevna potrošnja. Zbog veoma lošeg stanja vodovodne mreže kojom gazduje preduzeće, posebno zbog njene starosti, a što se manifestuje kroz velike gubitke vode, prinuđeni smo vršiti noćno obaranje pritiska, kako bi se obezbijedile dovoljne količine vode u dnevnim satima. Stanje vodovodne mreže, ali i drugih sredstava rada preduzeća je takvo zbog nedostatka sredstava za njihovo obnavljanje.

Ključni problem leži u činjenici da se ne primjenjuju odredbe Zakona o komunalnim djelatnostima („Službene novine Kantona Sarajevo“, br.31/04 i 21/05 ), prvenstveno člana 23. Njime je regulisano da će osnivač ukoliko preduzeće posluje sa cijenama koje ne odražavaju stvarne troškove rada preduzeća, nadomiriti razliku iz budžeta. Zakon je donesen 2004.godine, ali ova njegova odredba se u slučaju KJKP „Vik“ d.o.o. Sarajevo ne primjenjuje. Cijena vode i odvodnje nije utvrđena u skladu sa stvarnim troškovima poslovanja, u cijeni nikada nije sadržana amortizacija (prosječna ostvarena cijena vode i odvodnje je 1,18 KM metara kubnih vode, a stvarna 2,93 KM metara kubnih), tako da preduzeće ni približno ne može da obnavlja svoja sredstva u mjeri u kojoj je to potrebno.

Kako je ovaj problem prisutan preko trideset godina, a period rata je takođe ostavio svoje posljedice, preduzeće posluje sa gubitkom cijeli ovaj period, vodovodna mreža i oprema obnavlja se od slučaja do slučaja, gubici vode u mreži zavisno od uloženi sredstava budžeta Kantona se povećavaju ili neznatno smanjuju. Već nekoliko godina, ne da nema novca za obnavljanje sredstava rada, već je problem i za redovno poslovanje, jer se od prihoda koji se fakturiše u toku jedne godine, mogu izmiriti samo obaveze po osnovu poreza i doprinosa, plate zaposlenicima i troškovi el.energije. Da se





prvenstveno vodovodna mreža nalazi u veoma lošem stanju, preduzeće je sačinilo brojne informacije, koristilo svaku priliku da ukaže na probleme, podnosilo niz zahtjeva za povećanjem cijena i ukazalo na moguće posljedice u vodosnabdijevanju.

Na internet stranici KJKP „Vik“ d.o.o. Sarajevo od jula 2009. godine, objavljena je u formi tzv. letka, informacija pod naslovom „Zašto je vodosnabdijevanje ugroženo“, na koju nažalost nije bilo reakcija. Da preduzeće posluje sa cijenama koje nisu ekonomske konstatovao je i Ured za reviziju institucija u FBiH prilikom kontrole finansijskih izvještaja preduzeća za 2008. godinu, te je u izvještaju naveo da su cijene vode i odvodnje niže od stvarne cijene koštanja (ne uključuje trošak amortizacije). Planom poslovanja konstantno se planira gubitak i tako usvaja od nadležnog organa. Zbog svega naprijed navedenog, posebno teško stanje je u segmentu vodosnabdijevanja jer je nemogućnost obnavljanja sredstava rada dovela do toga da je danas njihova otpisanost veoma velika: vodovodna mreža otpisanost 74%, rezervoari 62%, pumpe za vodu 84%, elektro postrojenja 76%, laboratorijske opreme za kontrolu vode 81%. Oprema preduzeća ima ukupnu stopu otpisanosti od 84%, a samo mehanizacija 94% i teretna i vučna vozila 96%.

U posljednje dvije godine KJKP „Vik“ d.o.o. Sarajevo je dovedeno u situaciju ne samo da ne obavljaju dijelove sistema čija je knjigovodstvena vrijednost već duži period jednaka „nuli“, nego su prepolovili sredstva koja ulažu u tzv. redovno održavanje“.

Dosadašnjim odnosom prema cijeni vode učinjena je velika šteta KJKP „Vik“ d.o.o. Sarajevo, ali i društvu u cjelini, jer provodeći politiku „zaštite standarda“, a nekompezirajući ova sredstva na drugi način, stvaraju se realne pretpostavke da jednog dana i uredno dnevno vodosnabdijevanje bude problemom ovog grada. Poslovanje u postojećim uslovima nije ni približno stanju koje bi se moglo označiti normalnim, ali preduzeće poduzima sve raspoložive mjere da potrošači to što manje osjete. Činjenica je da se iz budžeta Kantona Sarajevo svake godine izdvajaju i sredstva kapitalnog granta za oblast vodovoda i kanalizacije, međutim nakon poslijeratnog uspostavljanja cjelodnevnog snabdijevanja grada vodom, najveći dio ovih sredstava usmjerava se na izgradnju mreže u neurbaniziranim naseljima, dok postojeća sredstva sve više propadaju.

Budžetom Kantona Sarajevo za 2011. godinu, nisu planirana sredstva za održavanje postojeće vodovodne mreže.

Preduzeće raspolaže sa pripremljenim programima za sanaciju vodovodnog i kanizacionog sistema za jednogodišnji, trogodišnji i desetogodišnji period, kao i sa razvojnim projektima, ali novac predstavlja ograničavajući faktor. Više o ovome se može naći na web stranici ([www.viksa.ba](http://www.viksa.ba)).

Prilog:  
Disketa

**MINISTAR**

Abid Jusić, dipl. pravnik

